

Alpinenergi: de jungen tsbinnen en de zukunft

En heibeger ka Vandans, en Vorarlberg, bart se hòltn der workshop "Alpinenergi - de jungen tsbinnen en de zukunft" enviretrong va de Òrbetgamoaschöft van Alpine Region ont unterstütz van lander as toalmöchen va Arge Alp. S ist a meglechket ver de toalnehmer za klöffen van temen va de energi, va de pachòltlechkait ont va de ekologisce bècksln en de alpineplatz. Der workshop bart se hòltn va de 10 finz as de 12 van heibeger 2026. Ver de inser provinz, ist kemmen organisart a selesion ver za vinnen viar jungen as enteressart sai' za nemmen toal en trèff. De toalnehmer miasn hom zbischn de 19 ont de 22 jor, kennen s taitsch, sai' noch za studiarn ont enteressart sai' en de temen va de energi ont va de umbèlt. Bail en workshop de toalnehmer barn kemmen innganommen en interaktiv òrbetn, abia an strategische spil gamòcht van Energetisch Istitut van Vorarlberg ont en internazionaln momentn ver ver za klöffen se aus

pet lait va de glaiche elt as kemmen va òndra alpine region, derzua en de toalnehmer van Poolbar-Festival 2026 va Feldkirch. De toalnehmer barn klöffen va de zukunft va de energi van Alpn, asou za trong as de tischer as de ausrotn möchen bos as tschbinnen de nain generazionen. Sèll as bart araus kemmen, bart kemmen vourstellt bail der Zömmtrèff van Stött Viarer van Arge Alp as bart kemmen gamòcht en herbest van 2026. Der programm van trèff ist der doi. As de 10 van heiberger vonk u' der workshop ont de toalnehmer barn se vinnen derèckt ka Vandans ont pasuachen de elèktresce zentral va illwerke vkw. Der to derno bart se hòltn der workshop kan zentrum illwerke vkw. Zoben de toalnehmer barn gea' kan Poolbar-Festival 2026 ka Feldkirch. Der dritte to barn sa kemmen hoa'm. De toalnehmer as tschèrlt kemmen sai', barn kriang de kostn van roas ont van kostn ver za nemmen toal en trèff.



Letratt van ORF Vorarlberg

De sèlln as enteressart sai' za nemmen toal en de selesion, meing ogem de vrog finz as de 21 van oberel. Òndra informazionen sai' as de internetsait va de gamoa'schöft Arge Alp www.argealp.org Arge Alp ist an òrbetgamoaschöft gagrun as de 12 van schanmikeal 1972 ka Mösern, en Tirol, pet en zil za stitzn de neat as enteressiarn

ungefèr 26 milionen va lait. De toalnehmer va Arge Alp sai' Taitchlont pet en Vraistött va Bayern, Osterraich pet de Lender Vorarlberg, Tirol ont Salzburg, Balschlont pet de Autonomen Provinzn va Poazn ont Trea't ont de Region Lombardia, de Schbaiz pet de Kantonen Graubünden, Sankt Gallen ont Tessin.
LORENZA GROFF

S BEIRTERPUACH: de Òrbetgamoaschöft van Alpine Region: Comunità di lavoro delle Regioni Alpine (Arge Alp) der der Zömmtrèff van Stött Viarer van Arge Alp: Conferenza dei Capi di governo di Arge Alp de pachòltlechkait: sostenibilità de ekologisce bècksln: transazione ecologica

Euregio: zboa prais ver junga untersuacher ont ver naiekaitn

Shòt bail finz as de 19 van oberel ver za nemmen toal en de zboa prais Euregio 2026. Peada de prais kemmen organisart Wirtschaftskammer van Euregio, de sèll van Tirol, va Poazn ont va Trea't. Der spruch van konkursn va haier ist "Størcha regionen. Størcha Europa. Zömm!" ont, ver en earste vòrt, haier mu men toalnehmen en de sezion "Junga Untersuacher" oder en de sèll "Naiekaitn". Der zil van konkursn ist der sèll za trong envire de untersuach ont de naiekaitn en de drai lander ont nogea' en guat enviretrong van Euregio abia sitz ver de birschöft. Zboa praisgericht barn ausschaung de vrong ont tschèrln de drai finalistn ver en iata kategori as barn vourstelln de òrbetn bail en Euregio Days en sònsta 29 van agest 2026 kan Europeische



De untersuacher as hom kriakt an prais en Forum va Alpbach 2024 [Letratt Matthias Sedlak - Tirol]

Forum en Alpbach en Tirol. Bail en sèll trèff barn aa ausgem de prais. Ver za meing toalnehmen en prais van jungen untersuacher, de toalnehmer miasn vourstell an

òrbet va untersuach gamòcht en an institutn van Euregio. De òrbetn, tschrim as englesch, meing kemmen vourtrong en de kategori "Birtschöft bissnschöftn so-

cialn bissnschöftn, rèchtbissnschöft, lear bissnschöftn, ont mentsch bissnschöftn" ont nou "Techniker bissnschöftn, naturaln bissnschöftn ont medizin". De prais ver de earstn drai sai' va 4.500, 2.000 ont 1.000 euro. Ver za nemmen toal en de kategori naiekaitn, de firmen as kemmen van gònze Euregio as hom veròrbetet an produkt, a teknologi ont naia dinstn, meing toalnehmen en de kategori "Konzeptn/Prototipn" ont "Modeln van business/Konsolidiartn produkt". Òndra informazionen mu men vinnen as de internetsait www.euregio.info/it/youngresearcher/. Ont www.euregio.info/innovazione/. Abia tsòck, de sèlln as sai' enteressart meing toalnehmen vour de 19 van oberel.

LORENZA GROFF
S beirterpuach:

 Prais junga untersuacher:
Premio Giovani Ricercatori

 Prais naiekait van Euregio:
Premio Innovazione dell'Euregio

 Birtschöft bissnschöftn:
scienze economiche

 socialn bissnschöftn:
scienze sociali

 rèchtbissnschöft:
scienze giuridiche

 lear bissnschöftn
scienze dell'educazione

 mentsch bissnschöftn:
scienze umane

 techniker bissnschöftn:
scienze tecniche

 naturaln bissnschöftn:
scienze naturali

Haiser za gem en zins pet minder gèlt

De Provinzljunta en trèff va de 20 van merz hòt verreglt de zaitn za meing ogem de vrong ver za kriang a haus en zins pet minder gèlt. Haier de vrong barn kemmen auganommen va de 27 van oberel finz as de 27 van moi ont va de 26 van schanmikeal finz as de 26 van òlderhaileng. De haiser sai' va ITEA S.p.A. ont de kemmen verzinsn en de familie as hom de rèchtn as men verlònk. De vrong kemmen ogem lai online durch der portal Stöttkearzimmer as men könn vinnen as de internetsait van Tolgamoaschöftn. As de internetsait mu men sechen de haiser as meing kemmen tschèrlt, biavle lait as meing drinnlem aa ver a niats haus.

Benns de haiser nèt pasn en de aigene familia, oder benns nèt enterèss hòt, mu men online invilln der model "U'song de hausnoat", òlbe durch en Stöttkearzimmer ont en portaln. Vour za trong inn de vrog, s ist noat za hom de kòrt van ICEF, as keart en de birtschöftlege situazion va de familia as s haus vrok.
LORENZA GROFF

S beirterpuach:

 s haus za gem en zins pet minder gèlt:
alloggio a canone moderato

 s Stöttkearzimmer:
Stanza del cittadino

 de birtschöftlege situazion:
condizione economico-patrimoniale


Kulturaltrèff en inser Tol

En mita as de 22 van oberel um òchta ont a hòlts zoben en de bibliotek va Schandurschl, bart se hòltn "Bibliotecari per un giorno". Oiar sait òlla inngalònt.

Filmen en sprochen minder kennt

De kulturalvraischöftn Babel, Cine-teca Sarda, RTS, EjaTV ont Areavisuale Film hom organisart de nai'nte edizion van prais van film Kentzeboghes. Der festival kimm gamòcht ver za gem bèrt en òlla de minderhaisprochen ont iberhaup van sèlln va de Sardegna. De sèlln as sai' enteressart za nemmen toal pet kurza filmen en de sprochen minder kennt abia de inser, meing ogem de vrog en de internetsait van konkurs.